

四庫全書

子部

欽定四庫全書

子部

戒子通錄卷二

詳校官中書

臣

張虎拜

刑部郎中

臣

許兆椿覆勘

謄錄監生

臣

溫

廷鑑

鑑

御製書宋劉清之紀左傳叔向母之事

叔向之母賢母也能訓其子為正人又能知叔虎之母

美而惡

入聲

將生敗子惡

去聲

之而不使見羊舌職劉清之

記此事而所注又不明幾不成句令人不可曉

宋劉清之撰戒

予通錄記叔向母一事引左傳云晉叔向之母妬叔虎之母美而不使其子皆諫其母母曰深山大澤實生龍蛇彼美余懼其生龍蛇以禍汝汝敝族也余何愛焉使往視寢生叔虎美而有勇藥盈篋之故羊舌氏之族及於難云云所注殊不明晰按左傳注不使謂不使見叔向之父羊舌職也又左傳汝敝族也下有國多大寵不仁人間之不亦難乎三語為劉清之刪去前後文義幾至不可曉亦著述者之過也然此誤不在

劉清之而在左邱明夫妬婦人之惡德也叔向之母蓋
能預見叔虎之母雖美而惡將生惡子以敝羊舌氏之
宗然從子之諫使往視職之寢果生虎而羊舌氏之族
遂反於難是誠仁人能惡人而有先見之明者矣左氏
應謂之惡去聲而不宜謂之妬是誠其浮夸而不實也以
致千載之下謂叔向之母果妬焉余不可不正其誣

欽定四庫全書

子部一

提要

戒子通錄八卷

儒家類

臣等謹案戒子通錄八卷宋劉清之撰清之字子澄號靜春臨江人紹興二年進士光宗時知袁州宋時本傳稱其生平著述甚多是書其一也其書博採經史羣籍凡有闕庭訓者皆節錄其大要至於母訓閭教亦備述焉

史稱其甘貧力學博極羣書故是編採摭繁
富或不免於冗雜然其隨事示教不憚於委
曲詳明雖瑣語碎事莫非勸戒之資固不以
過多為患也元虞集甚重其書嘗勸其後人
刻諸金谿後崔棟復為重刻顧自宋以來史
志及諸家書目皆不著錄惟文淵閣書目載
有二冊亦無卷數外間傳本尤稀今謹據永
樂大典所載約畧篇頁釐為八卷所引諸條

原本於標目之下各粗舉其人之始末其中
間有未備者今並為考補增注以一體例惟
自宋以前時代錯出頗無倫次蓋一時隨手
摘錄未經排比之故今亦姑存其舊焉乾隆
四十六年九月恭校上

總纂官

臣

紀昀

臣

陸錫熊

臣

孫士毅

總校官

臣

陸

費

墀

元虞集序

愚嘗聞之人受天之命以生亦猶子之稟父命而行也
君子畏天命而不敢違猶孝子之從父命而不敢悖事
天事親其致一也人之事天而不求於事親則不可以
為人子之事親而不足以事天則不可以為子是故父
命即天命也同一至仁而無私者也然而天不能為諄
諄之誨也知命者觀乎風雨霜露之迹變化消息之故
而得之詩云昊天曰明及爾出王昊天曰旦及爾游衍

庶幾奉以周旋者乎故曰富貴福澤將厚吾之生也貧
賤憂戚庸玉女於成也莫非惟其所命而順受其正者
也事親之道亦若是而已矣夫親之於其子也蓋無不
愛焉欲其善良欲其賢智欲其福澤長久而不欲其克
惡愚不肖不欲其困乏斷折其心無有異者語曰厲人
生子夜而取火是欲其子之善者至於凡庸盡然況中
人以上乎是故愛之至則慮之深知之明則言之切或
因其材或因其事或抑其過或勗其不及或正其偏或

定其是以啟迪其所未知而增益其所可進雖人品不同而立言遠近淺深頓異要其指歸皆愛其子而已矣天理之公孰有著於此者乎昔靜春劉先生輯凡為人父者之戒其子言載書傳者以為戒子通錄意其所以謂之通錄者豈不以天下之為人父者各以其愛子之心而為之戒天下之為人子者皆可因其所戒而省念之如聞其父之命親在求諸容色辭氣之接而下能盡也即此書以充其所未達親歿思其精神志意之微而

有不及聞也即此書以徵其所欲知一語默動息無非受命於其親者矣天理寧有間斷乎集嘗得其書而敬愛之服行講明不敢後也他日至臨川劉氏之族在金谿者多賢俊每出其先世遺書相示僕慨然問之曰戒子通錄無恙乎有曰倣叔熙者對曰是吾世守以保族者也敢忘之乎集曰子之家顯且二三百年豈偶然乎蓋又聞之孝弟之順德視犯上作亂之惡其間之相去甚不相似也而有子推兩端之極於一言之間豫章羅

先生曰天下無不是之父母而陳公了翁推致之曰亂
臣賊子之起常始於見父母之不是嗚呼不受命之害
至於如此三君子之言所以有功於萬世名教者也而
忽焉者不足以知其言之有功也必有觀乎此書而用
力焉則能惕然恐懼而所以盡心於事天事親者矣子
盡刻而廣之也敝曰諾明年以成書來告因請題其說
云

元陳黃裳序

人之愛子何所不至哉自襁褓鞠乳以至成人授之以
土宇人民而欲其富傳之以印綬車服而欲其貴凡可
以與之者壹無靳色雖我躬不閱亦必思所以遺後謂
不若是則父母之責未盡也然此豈所以愛子哉石碣
曰愛子教之以義方古者子生八歲入小學立之師傅
教之禮樂射御書數達之洒掃應對進退蓋自天子之
儲貳諸侯之世子公卿大夫之子以至於士庶人莫不
以此為急先務必義方之教行由小學以進於大學視

身承家肯堂肯播而後能保其所謂土宇人民印綬車服者此固父母所望於子而為人子者亦豈易事哉近世朱徽文公既成小學之書又東劉靜春集史傳嘉謨善行與宋氏諸儒之格言為戒子通錄凡為父母為子姪為兄弟為夫婦之道具是階庭講學耳濡目染非苟知之亦允蹈之其於世教實非小補湖湘舊有板今不復存平陽崔君架之間以語余幕府餘閒手自讎校且繡梓以廣其傳盛心可尚已以儒飭吏言政及化豈俗

吏所能哉既為嘉歎且繫之辭大德庚子春丁前進士
眉山陳黃裳叙

元曾福昇序

立三極備萬物者人也而所以為人之道其要有三重
焉一曰宅心二曰立身三曰教子然能宅則能立能立
則能教君子不謂三也昔者曾子之在聖門其親承斯
道之傳繼述先聖之志者孝經一編大學一書而已其
他遺言見於問載於記班班可攷曷嘗外是而他有所

謂哉試即二書之表而推之其曰宏毅任重戒之戒之
宅心之謂也其曰三省自反而縮養敬安卒慎行其身
立身之謂也夫惟宅心立身之道亦既若是其往矣後
世雖有弗肯堂弗肯播而能讀其書者亦將化蒲廬而
肖螺贏矣矧有是者哉友人崔架之其宅心立身知所
本者與得靜春劉先生所集戒子通錄善本以刻諸梓
將廣其傳是亦錫類之美事雖然即吾心吾身之所有
則其不言之教固已諄諄於其子矣而況昭諸不朽若

是乎故吾因架之今之此舉并以發是錄言外之意初亦不出於大學修正齊家之要領也舉瞻孔庭有嚴在日子其勉諸以盡為人之道以任三極萬物之責大德庚子秋中日富州文學掾廬陵曾福昇題

元崔棟序

近得臨江劉清之所輯戒子通錄一編皆古者明君良臣慈父淑母教誡子弟理明意切讀之能使為人臣為子弟者油然而起忠孝之心惜此本傳之者寡遂鋟梓以

廣之庶有補於將來大德庚子良月河東崔棟謹識

欽定四庫全書

戒子通錄卷一

宋 劉清之 撰

列女傳 胎教

古者婦人妊子寢不側坐不邊立不蹕不食邪味割不正不食席不正不坐目不視於邪色耳不聽於淫聲夜則令瞽誦詩道正事如此則生子形容端正才德過人矣太王之子曰王季王季成童靡有過失娶太任太任之性端一誠莊惟德之行不視惡色不聽淫聲不出教

言能以胎教生文王而明聖太任教之以一而識百卒
為周宗

禮記內則名子辭

子生父咳而名之父曰
欽有帥母對曰記有成

子生三日始負之異為孺子室於宮中必求寬裕慈惠
溫良敬恭謹而寡言者使為子師其次為慈母其次為
保母皆居子室他人無事不往三月之末擇日剪髮為
髻男角女羈否則男左女右是日也妻以子見於父母
先相曰母某敢用時日祇見孺子夫對曰欽有帥父執

子之右手咳而名之妻對曰記有成子師辯告諸婦諸母名夫告宰名宰辯告諸男名書曰某年某月某日某生而藏之

儀禮冠辭

士冠三加辭禮辭三醺辭字辭

冠始加祝曰令月吉日始加元服棄爾幼志順爾成德壽考維祺介爾景福再加曰吉月令辰乃申爾服敬爾威儀淑慎爾德眉壽萬年永受胡福三加曰以歲之正以月之令咸加爾服兄弟具在以成厥德黃耆無疆受

天之慶 醴辭曰甘醴惟厚嘉薦令芳拜受祭之以定
爾祥承天之休壽考不忘 醢辭曰旨酒既清嘉薦亶
時始加元服兄弟具來孝友時格永乃保之再醢曰旨
酒既清嘉薦伊脯乃申爾服禮儀有序祭此嘉爵承天
之祐三醢曰旨酒令芳邊豆有楚咸加爾服肴升折俎
承天之慶受福無疆 字辭曰禮儀既備令月吉日昭
告爾字爰字孔嘉髦士攸宜宜之於假永受保之曰伯
某甫仲叔季唯其所當

婚辭

士昏父醮子命之父送女命之母命之庶母以父母之命命也

昏父醮子命之往迎爾相承我宗事勗帥以敬先妣之
嗣若則有常子曰諾唯恐弗堪不敢忘命父送女命之
曰戒之敬之夙夜毋違命毋施衿結帨曰勉之敬之夙
夜毋違宮事庶母及門內施鞶申之以父母之命命之
曰敬恭聽宗爾父母之言夙夜無愆視諸衿鞶

戒書

周武王

姬發踐阼三日召師尚父問焉有萬世可以為子孫常者乎尚父對

并王為

戒書

師尚父道書之言曰敬勝怠者吉怠勝敬者滅義勝欲者從欲勝義者凶王聞書之言恐懼退而為戒焉為席前左端之銘曰安樂必敬前右端之銘曰無行可悔鑑之銘曰見爾前慮爾後盤之銘曰與其溺於人寧溺於淵溺於淵猶可游也溺於人不可救也楹之銘曰毋曰胡殘其禍將然毋曰胡害其禍將大毋曰胡傷其禍將長劒之銘曰帶之以為服動必行德行德則興倍德則崩矛之銘曰造矛造矛少間弗忍終身之羞予一人所

聞以戒後世子孫

漢孝武

景帝子徹子閔為齊王旦為燕王胥為廣陵王同日立皆賜策各以國土風俗白戒

馬凡

三章

嗚呼小子閔受茲青社朕承天序

案朕承天序史記作朕承祖考惟稽

古建爾國家封於東土世為漢藩輔嗚呼念哉共朕之
詔惟命不于常人之好德克明顯光義之不圖俾君子
怠悉爾心允執其中天祿永終厥有愆不臧廼凶於而
國害於爾躬嗚呼保國人民可不敬與王其戒之嗚

呼小子旦受茲元社建爾國家封於北土世為漢藩輔
嗚呼薰鬻氏虐老獸心加以姦巧邊眚朕命將率徂征
厥罪北州以綏悉爾心毋作怨毋作隳德毋廼廢備非
教士不得從徵王其戒之 嗚呼小子胥受茲赤社建
爾國家封於南土世為漢藩輔古人有言曰大江之南
五湖之間其人輕心揚州保疆三代要服不及以政嗚
呼悉爾心祇祇兢兢廼惠廼順毋侗好逸毋邇宵人惟
法惟則書云臣不作福不作威靡有後羞王其戒之

梁簡文帝

蕭綱戒子當陽公大心

汝年時尚幼所闕者學可久可大其唯學歟所以孔丘
言吾嘗終日不食終夜不寢以思無益不如學也若使
牆面而立沐猴而冠吾所不取立身之道與文章異立
身先須謹重文章亦勿放蕩

周公

周文王子姬旦旦子伯禽封於魯將之國故戒之也又一章荀卿子又一章劉向

君子不施其親不使大臣怨乎不以故舊無大故則不
棄也無求備於一人又云君子力如牛不與牛爭力

走如馬不與馬爭走智如士不與士爭智 又云德行
廣大而守以恭者榮土地博裕而守以險者安祿位尊
盛而守以卑者貴人衆兵強而守以畏者勝聰明睿智
而守以愚者益博文多記而守以淺者廣去矣其毋以
魯國驕士矣

文倣傳 周書

案維文王以下係節錄文倣篇中
語九年在鄘以下係節錄文倣篇

中語

維文王告堯懼後嗣之無保庚辰詔太子發曰汝敬之

哉民物多變民何嚮非利利維生痛痛維生樂樂維生
禮禮維生義義維生仁嗚呼敬之哉民之適敗上察下
遂信何嚮非私私維生抗抗維生奪奪維生亂亂維生
亡亡維生死嗚呼敬之哉 九年在鄱召太子發曰嗚
呼吾語汝所保所守守之哉厚德廣惠忠信愛人君子
之行不為驕侈不為靡泰山林非時不升斤斧川澤非
時不入網罟不麝不卵孤寡辛苦咸賴生焉無殺夭胎
無伐不成材無墮四時如此者有十年之積有十年之

積者王無一年之積者亡

書顧命

周成王

周成王姬誦作
顧命保元子釗

嗚呼疾大漸惟幾病日臻既彌留恐不獲誓言嗣茲予
審訓命汝昔君文王武王宣重光奠麗陳教則肄肆不
違用克達殷集大命在後之侗敬迓天威嗣守文武大
訓無敢昏逾今天降疾殆弗興弗悟爾尚明時朕言用
敬保元子釗弘濟于艱難柔遠能邇安勸小大庶邦思
夫人自亂于威儀爾無以釗冒貢于非幾

葉公

葉公子高楚縣公將死命其子

母以小謀敗大作母以嬖御人疾莊后母以嬖御士疾

莊士大夫卿士

魏武帝

曹操告子丕等案此條與下魏收李勣並錄之者不以人廢言也

吾在軍中執法是也至小忿怒大過失不當效

戒子言

魏文帝

曹丕戒子又使弟植守鄴戒之

父母於子曰雖肝腸腐爛為其掩蔽不欲使鄉黨士友聞其罪過然行之不改久久自知之用此仕官不亦難

乎 又曰吾昔為頓邱今年二十三思此時所行無悔
於今今汝年二十三矣可不勉與

蕭嶷

南齊高帝子豫章文獻
王戒子子廉子恪等

凡富貴少不驕奢以約失之者鮮矣漢世以來侯王子
弟以驕恣之故大者滅身喪族小者削奪邑地可不戒
哉吾之後當共相勉勵篤睦為先才有優劣位有通塞
運有富貧此自然之理無以相凌侮勤學行守基業修
閨庭尚閒素如此足無憂患

戒子言

光武

秀字文叔每旦視朝日昃乃罷夜分乃寐皇太子見帝勤勞不怠承

間諫曰陛下有禹湯之明而失黃老養性之福願頤愛精神優游自寧帝曰

我自樂此不為疲也

敕後主辭 蜀漢先主

備字元德涿郡人子後主禪字公嗣凡一章

朕初疾但下痢耳後轉雜他病殆不自濟人五十不稱
天年已六十有餘何所復恨不復自傷但以卿兄弟為
念射君到說丞相歎卿智量甚大增修過於所望審能
如此吾復何憂勉之勉之勿以惡小而為之勿以善小

而不為惟賢惟德能服於人汝父德薄勿效之可讀禮
記漢書閒暇歷觀諸子益人意智又曰汝與丞相從事
事之如父

帝範 唐太宗

隴西人諱世民為書十二篇戒子
高宗治 案帝範十二篇其首尾

兩條則節錄
前後序也

蓋聞大德曰生大寶曰位樹之君上所以撫育黎元自
非明哲武文安可叨臨神器先皇當經綸之會實定王
業逮余以弱冠之年思靜大難躬擐甲冑親當矢石剪

長鯨而清四海掃欃槍而廓八紘既而承慶

案原本天作來慶

潢濫登

案原本作登暉

璇極戰戰兢兢若臨深而御朽日慎一

日思善始而令終汝以幼年偏鍾慈愛義方多闕庭訓

有乖不知稼穡之艱難未辨君臣之禮節廢寢忘食思

此為憂披鏡前蹤博採史籍聚其要言以為近誠如

山嶽高峻而不動如日月貞明而普照寬大其志足以

併包平正其心足以制斷奉先思孝處下思恭傾已勤

勞以行德義此為君之體也

君體

夫六合曠道大寶重

任遠近相持親疎並用則并兼路塞逆節不生是以封建親戚以為藩衛封之太彊則有噬臍之患致之太弱則無固本之理莫若衆建宗親而少其力使輕重相鎮憂樂是同盛衰一心安危同力

建親

夫國之匡輔必恃

忠良任使得人天下自治是以明君博訪英賢搜揚側陋求之則勞任之斯逸此以求賢為貴也

求賢

夫良匠

無棄材明君無棄士人才有長短能有巨細君擇才而授官臣量已而受職則委任責成不勞而治此設官不

可不審也

審官

夫王者高居深視虧聽阻明恐有過而

不聞懼有闕而莫補虛心思獻替之謀傾耳佇忠正之

說昏主則不然說者拒之以威勸者窮之以罪大臣惜

祿而莫諫小臣畏誅而不言其為壅塞無以自知此拒

諫之惡也

納諫

夫讒佞之徒國之蝨賊也惡忠賢之在

已上恐富貴之不我先先意承旨以悅於君巧言令色

以親於上今人顏貌同於目際猶不自瞻是非在於無

形焉能自覩况逆耳之辭難受順心之說易從故明主

納諫病就苦而能消暗主從諛命因甘而致殞可不戒

哉

去讒

夫君者儉以養性靜以修身儉則民不勞靜則

下不擾不竭民力不匱民財亂世之君極其驕奢恣其

嗜慾人神憤怒上下乖離佚樂未終傾危已至此驕奢

之忌也

戒盈

夫奢儉由人安危在已斯二者榮辱之端

五關近閉則令德遠盈千慾內攻則凶源外發故驕出

於志不節則志傾慾生於身不遏則身喪故桀紂肆情

而禍結堯舜約已而福延可不務乎

崇儉

顯罰以威之

明賞以化之威立則惡者懼化行則善者勸故賞者不
德君功之所致也罰者不怨上罪之所當也故云無偏
無黨王道蕩蕩此賞罰之權也

賞罰

夫食為民天農為

政本國無九歲之儲不足備水旱家無一年之服不足
禦寒暑故上不節心則下多逸志莫若約己正身則民

不言而化矣

農務

夫土地雖廣好戰則人彫邦境雖安

忘戰則民殆是以勾踐軾蛙卒成霸業徐偃棄武終於

喪邦何則越習其威徐忘其備也

閱武

夫宏風導俗莫

尚於文敷教訓民莫善於學因文以隆道假學以光身
質蘊吳竿非筈羽不美性懷辨慧非積學不成此崇文
之術也

崇文

此十二條帝王之大綱安危興廢咸在茲

焉古人有云非知之艱唯行不易行之可勉唯終實難
是以暴亂之君非獨明於惡路聖哲之主豈獨見於善
途良由大道遠而難遵邪徑近而易踐小人俯從其易
不能力行其難是知禍福無門唯人所召欲悔非於既
往唯慎過於將來擇哲王以師焉思以古為前鑑夫取

法於上僅得為中取法於中故為其下自非上哲不可
效焉吾在位以來所制多矣奇麗服翫錦繡珠玉不絕
於前此非防慾也雕楹刻桷高臺深池每興其役此非
儉志也犬馬鷹鷂無遠必致此非節心也數有行幸以
亟勞人此非屈已也斯數事者吾之深過勿以茲為是
而取法紫原本
作後法焉但我濟育蒼生其益多矣平定區宇
厥功大矣益多損少人不以為怨功大過微德未以之
虧然猶盡美之蹤於焉多媿盡善之道顧此懷慙况汝

無纖毫之功直緣基而履慶若崇善以廣德則業泰而身安若肆情以縱非則業傾而身喪且成遲敗速者國基也失易得難者天位也可不慎哉可不惜哉

戒皇屬 國朝太宗類苑

太宗嘗謂皇屬曰朕即位十三年矣外絕游觀之樂內卻聲色之娛汝等生於富貴長自深宮夫帝子親王先須克己每著一衣則憫蠶婦每餐一食則念耕夫至於聽斷之間勿先恣其喜怒朕每親臨庶政豈敢憚於焦

勞汝等勿鄙人短勿恃已長乃可永久富貴以保終吉
先賢有言逆吾者是吾師順吾者是吾賊不可不察也

庭聞

孔子

名丘字仲尼魯人子鯉字伯魚仲尼嘗獨立鯉趨而過庭聞斯二者

學詩乎不學詩無以言學禮乎不學禮無以立又曰女
為周南召南人而不為周南召南其猶正牆面而立也
與

家戒

王肅

字子雍魏散騎常侍家戒歐陽詢所記為詳案肅東海人

夫酒所以行禮養性命為歡樂也過則為患不可不慎

是故賓主百拜日飲酒而不得醉先王所以備酒禍也
凡為主人飲客使有酒色而已無使至醉若為人所強
必退席長跪稱父戒以辭之敬仲辭君而況於人乎為
客又不得唱造酒史也若為人所屬下坐行酒隨其多
少犯令行罰示有酒而已無使多也禍變之興常於此
作所宜深慎

杜恕

字務伯京兆人魏黃門侍郎稱東郡張閭之為人

張子臺視之似鄙樸人然其心中不知天地間何者為

美何者為好敦然似與陰陽合德者作人如此自可不
富即貴禍患當何從而來

嵇康

字叔夜
譙國人
晉中散大夫

人無志非人也但君子用心量其善者必擬議而後動
若志之所之則口與心誓守死無二恥躬不逮期於必
濟若心疲體懈或牽於外物或累於內欲不堪近患不
忍小情則議於去就議於去就則二心交爭二心交爭
則向所見役之情勝矣或有中道而廢或有未成而敗

以之守則不固以之攻則怯弱與之誓則多違與之謀則善泄臨樂則肆情處逸則極意故雖繁華熠燿無結秀之效終年之勤無一旦之功斯君子所以歎息也所居長吏但宜敬之而已矣不當極密不宜數往往當有時其有衆人又不當獨在後又不當前所以然者長吏喜問外事或時發舉則恐爲人所說無以自免也宏行寡言慎備自守則怨責之路解矣其立身自當清遠若有煩辱欲人之盡命託人之請求謙言辭謝某素不預

此輩事當相安亮耳若有怨急心所不忍可外違拒密
為濟之所以然者上遠宜適之幾中絕常人淫輩之求
下全東脩無誨之文案本集作下全東脩無玷之稱稱此又秉志之一
隅也

戒子言

仲孫獲

孟釐子魯卿且死誠其嗣懿子仲孫何忌

吾聞聖人之後雖不當世必有達者今孔丘年少好禮
其達者歟吾即沒若必師之

孫叔敖

楚相將死戒其子叔敖死王以美地封其子子辭請寢邱累世不失

王數封我矣吾不受也我死王則封汝必無受利地楚越之間有寢邱者此其地不利而名惡可長有者唯此也

歐陽地餘

千乘人漢元帝少府將死戒子案地餘係歐陽生字正思之孫世受尚書

我死官屬即送汝財物慎毋受汝九卿儒者子孫以廉潔著可以自成

嚴光

或云嚴君平姑存之案光字子陵餘姚人光武時除諫議大夫不屈耕於富春山君平

名遵臨邛人以下易隱於成都市

十誠嗜欲者潰腹之患也貨利者喪身之仇也嫉妬者
凶軀之害也讒慝者斷脛之兵也謗毀者雷霆之報也
殘酷者絕世之殃也陷害者滅嗣之場也博戲者殫家
之漸也嗜酒者窮餒之始也

案第十誠
原註缺文

樊宏

字靡卿南陽人後漢壽張侯為人
謙柔畏謹不求苟進常戒其子

富貴盈溢未有能終者吾非不喜榮勢也天道惡滿而
好謙前世貴戚皆明戒也保身全已豈不樂哉

辛憲英

辛毗女羊耽妻子琇為鍾會參軍伐
蜀英憂之案此條宜入後母訓內

行矣戒之古之君子入則致孝於親出則致節於國在職思其所司在義思其所立不遺父母憂患而已軍旅之間可以濟者其惟仁恕乎汝其謹之

源賀

後魏太尉遺令勅諸子
索賀西平人

吾頃以老患辭事不悟天慈降恩爵逮於汝汝其毋傲
忤毋荒怠毋奢越毋嫉妬疑思問言思審行思恭服思
度遏惡揚善親賢遠佞目觀必貞耳屬必正誠勤以事
上清約以臨己吾終之後所葬時服單襚足申孝心芻

靈明器一無用也

宋隱

字處默西河人魏道武時領吏部選臨終謂其子

汝等苟能入順父兄出悌鄉黨仕郡幸而至功曹史以忠清奉上足以不勞遠詣臺閣也

向朗

字巨達襄陽人蜀左將軍案襄陽記此係遺言戒子蜀志朗子條景耀中為御史中丞

天地和則萬物生君臣和則國家平九族和則動得所求靜得所安是以聖人守和以存以亡也吾楚國之小子耳而早喪所天為二兄所誘養使其性行不隨祿利

以墮今但貧耳貧非人患惟和為貴汝其勉之

曹哀

魏武子中山恭王其世子孚嗣

汝幼少未聞義方早為人君但知樂不知苦不知苦必將以驕奢為失也接大臣務以禮雖非大臣者猶宜答拜事兄以敬恤弟以慈兄弟有不足之行當造膝諫之諫之不從流涕喻之喻之不改乃白其母若猶不改當以奏聞并辭國土與其守寵罹禍不若貧賤全身也此亦謂大罪惡耳其微過細故當掩之

士會

字季晉大夫食邑於隨曰隨武子後更受范曰范武子將老召其子士燮戒之

燮乎吾聞之喜怒以類者鮮易者實多詩曰君子如怒
亂庶遄沮君子如祉亂庶遄已君子之喜怒以已亂也
弗已者必益之邵子其或者欲已亂於齊乎不然余懼
其益之也爾從二三子惟敬

高漢筠

後晉客省使在常山戒子意葬常山從其欲也 案漢筠字時英齊州歷山人見薛

居正五
代史

吾遊歷多矣觀風俗淳厚以經術相尚罕得如此地者

教子訓孫可為終焉之計負國鑿荒以為田種樹以成圃凡議婚嫁必接士人

荀勗

字公曾潁陰人晉尚書令或勸有所營置令有歸戴者勗語諸子

人臣不密則失身樹私則背公是大戒也汝等亦當宦達人間宜識吾此意

戒子言 阮籍

字嗣宗陳留人晉步兵校尉與兄子咸字仲容皆任達不拘子渾少

慕通達不節小節籍謂曰

仲容已豫吾此流汝不得復爾

崔罔

字法俊清河人北齊鴻臚卿臨終戒其二子

夫恭儉福之輿傲侈禍之機乘福輿者浸以康休蹈禍機者忽而傾覆汝其戒歟

牛宏

隋光祿大夫宏字顯仁鵠人

汝等子孫宜以誠敬自立

傅奕

相州人唐太史令臨終戒其子

周孔六經是為名教汝宜習之妖人亂華舉時皆惑唯獨竊歎衆不我從悲夫汝等勿學也

房喬

字元齡齊州人唐宰相集古今聖賢家戒書於屏風令諸子各取其一因戒之

不可以地望陵人驕奢沈溺袁家累葉忠節是吾所尚

汝宜師遵

閻立本

京兆人唐武后右相立本雖有應務之才尤善圖畫太宗嘗與侍臣學士泛舟春苑

池中有異鳥隨波容與詔坐者為詠令立本寫馬不勝愧報退戒其子案立本新舊唐書皆不載

其字兄讓字立德以字行則立本當亦以字行也

吾少好讀書幸免牆面緣情染翰頗及儕輩唯以丹青

見知躬廝役之務辱莫大焉汝宜深戒勿習此末技

穆寧

懷州人唐祕書通達體命未嘗服藥每戒諸子案新唐書穆寧撰家令訓子人一通

吾聞君子之事親養志為大直道而已慎無為諂吾之志也

張霸

字伯饒成都人後漢侍中

人生一世但當畏敬於人若不善加已直為受之

誨子弟言 朱仁軌

字德容唐逸人門人諡曰孝友先生敬則其弟也

終身讓路不枉百步終身讓畔不失一段

戒子孫言 王祥

字休徵琅邪人晉三公疾篤遺令訓子孫

夫言行可覆信之至也推美引惡德之至也揚名顯親孝之至也兄弟怡怡宗族欣欣悌之至也臨財莫過乎讓此五者立身之本

李襲譽

字茂實隴西人唐涼州都督

吾近京有賜田十頃耕之可以充食河內有賜桑千樹蠶之可以充衣江東所寫之書讀之可以立身吾沒之後爾曹但能勤此三事亦何羨於人

姚崇

字元之陝州人唐宰相遺令戒子孫

古人云富貴者人之怨也貴則神忌其滿人惡其上富則鬼瞰其室虜利其財自開闢已來書籍所載德薄任重而能壽考無咎者未之有也故范蠡疏廣之輩知足之分前史多之况吾才不逮古人而久竊榮寵位逾高而益懼恩彌厚而增憂往在中書邁疾虛憊雖終匪懈而諸務多闕薦賢自代屢有誠祈人欲天從竟蒙哀允優游園沼放浪形骸人生一代斯亦足矣田巴云百年之期未有能至王逸少云俛仰之間已為陳迹誠哉

此言比日見諸達官身亡已後子孫既失覆蔭多至貧寒斗尺之間參商是競豈惟自玷乃更辱先無論曲直俱受嗤毀莊田水碾既衆有之遞相推倚或致荒廢陸賈石苞皆古之賢達也至預為定分以絕後爭吾靜思之深所歎息昔孔子大聖母墓毀而不修梁鴻至賢父亡席卷而葬楊震趙咨盧植張奐皆當代英達通識今古咸有遺言屬以薄葬或濯衣時服或單帛幅巾子孫皆遵成命迄今以為美談凡厚葬之家例非明哲或溺

於流俗不察幽明咸以奢厚為忠孝以儉薄為慳惜至
令亡者致戮尸暴骸之酷存者陷不忠不孝之誚可為
痛哉可為痛哉且五帝之時父不葬子兄不哭弟言其
致仁壽無夭橫也三王之代國祚延長人用休息其人
臣則彭祖老聃之類皆享遐齡當此之時未有佛教豈
抄經鑄像之力設齋施物之功耶宋書西域傳著名僧
為白黑論理澄明白足解沈疑宜觀而行之且死者是
常古來不免所造經像何所施為夫釋迦之本法為蒼

生之大弊汝等各宜警策勿效兒女子曹終身不悟也
吾亡後必不得輒用餘財為無益之佛事亦不得妄出
私物徇追福之虛談道士者本以元牝為宗初無趨競
之教而無識者慕僧家之有利約佛教而為業欲尋老
君之說亦興道齋之文又用僧例失之彌遠汝等勿拘
鄙俗輒屈於家汝等身沒之後亦教子孫依吾此法

欽定四庫全書

戒子通錄卷二

宋 劉清之 撰

家訓

顏之推

琅邪人終隋開皇太子學士著書二十篇訓子思魯等其大畧具此

按之推字子介顏子三十五世孫子思魯字孔歸唐秦府記室

夫聖賢之書教人誠孝慎言檢迹立身揚名亦已備矣
吾今所以復為此者非敢軌物範世也業以整齊門內
提撕子孫夫同言而信信其所親同命而行行其所服
禁童子以暴謔則師友之戒不如傳婢之指揮止凡人

之闢閱則堯舜之道不如寡妻之誨諭吾望此書為汝
曹之所信猶賢於傅婢寡妻耳 吾家風教素為整密
昔在齟齬便蒙誨誘每從兩兄曉夕溫清規行矩步安
辭定色鏘鏘翼翼若朝嚴君焉賜以優言問所好尚勵
短引長莫不懇篤 嬰稚識人顏色知人喜怒便加教
誨使為則為使止則止比及數歲可省笞罰父母威嚴
而有慈則子女畏慎而生孝矣吾見世間無教而有愛
每不能然飲食運為恣其所慾宜戒翻獎應訶反笑至

有識知謂法當爾驕慢已習方復制之捶撻至死而無
威忿怒日隆而增怨逮乎成長終為敗德孔子云少成
若天性習慣如自然是也俗諺曰教婦初來教兒嬰孩
誠哉斯語 凡人不能教子女者亦非欲陷其罪惡但
重於呵怒傷其顏色不忍楚撻慘其肌膚耳當以疾病
為喻安得不用湯藥針艾救之哉王父司馬按家訓原
本作王大
司馬下亦作王
在湓城無父字母魏夫人性甚嚴正王父在湓城時為
三千人將年踰四十少不如意猶捶撻之故能成其勲

業梁元帝時有一學士聰敏有才為父所寵失於教義
一言之是徧於行路終年譽之一行之非掩藏文飾冀
其自改年登婚宦暴慢日滋竟以言語不擇為周逖抽
腸繫鼓云 父子之嚴不可以狎骨肉之愛不可以簡
簡則慈孝不接狎則怠慢生焉由命士以上父子異宮
此不狎之道也抑搔癢痛懸衾篋枕此不簡之教也

人之愛子罕亦能均自古及今此弊多矣賢俊者自可
賞愛頑魯者亦當矜憐有偏寵者雖欲以厚之更所以

禍之共叔之死母實為之趙王之戮父實使之 夫有
人民而後有夫婦有夫婦而後有父子有父子而後有
兄弟一家之親此三者而已矣自茲以往至於九族皆
本於三親焉故於人倫為重者也不可以不篤兄弟者
分形連氣之人也方其幼也父母左提右挈前襟後裾
食則同案衣則傳服學則連業遊則共方雖有悖亂之
人不能不相愛也及其壯也各妻其妻各子其子雖有
篤厚之人不能不少衰也娣姒之比兄弟則踈薄矣今

使踈薄之人而節量親厚之人猶方底而圓蓋必不合
矣唯友悌深至不為傍人之所移者免夫 二親既沒
兄弟相顧當如形之與影聲之與響愛先人之遺體惜
己身之分氣非兄弟何念哉兄弟之際異於他人望深
則易怨地親則易弭譬猶居室一穴則塞之一隙則塗
之則無頽毀之慮如雀鼠之不卹風雨之不防壁陷楹
淪無可救矣僕妾之為雀鼠妻子之為風雨甚哉兄弟
不睦則子姪不愛子姪不愛則羣從踈薄羣從踈薄則

僮僕為讎敵矣如此則行路皆踏其面而蹈其心誰救之哉人或交天下之士皆有歡愛而失敬於兄者何其能多而不能少也人或將數萬之師得其死力而失恩於弟者何其能踈而不能親也 娣姒者多爭之地也使骨肉居之亦不若各歸四海感霜露而相思佇日月之相望也況以行路之人處多爭之地能無間者鮮矣所以然者以其當公務而執私情處重責而懷薄義也若能恕已而行換子而撫則此患不生矣 人之事兄

不可不同於事父何為愛弟不及愛子乎是反照而不明也 沛國劉璉嘗與兄璉連棟隔壁璉呼之數聲不應良久方答璉怪問之乃云向來未著衣帽故也以此事兄可以免矣 吉甫賢父也伯奇孝子也賢父御孝子合得終於天性而後妻間之伯奇遂放曾參婦死謂其子曰吾不及吉甫汝不及伯奇王駿喪妻亦謂人曰我不及曾參子不如華元並終身不娶此等足以為戒其後假繼慘虐孤遺離間骨肉傷心斷腸者何可勝數

慎之哉 江左不諱庶孽喪室之後多以妾媵終家事
疥癬蚊蠅或未能免限以大分故稀鬪閼之恥河北鄙
於側出不預人流是以必須重娶至於三四母年有少
於子者後母之弟與前婦之兄衣服飲食爰及婚嫁至
於士庶貴賤之隔俗以為常身沒之後辭訟盈公門謗
辱彰道路子誣母為妾弟黜兄為傭播揚先人之辭迹
暴露祖考之長短以求直已者徃徃而有悲夫自古奸
臣佞妾以一言陷人者衆矣况夫婦之義曉夕移時婢

僕求容助相說引積年累月安有孝子乎此不可不畏
凡庸之性後夫多寵前夫之孤後妻必虐前妻之子
非為婦人懷嫉妬之情丈夫有沉惑之僻亦事勢使之
然也前夫之孤不敢與我子爭家提携鞠養積習生愛
故寵之前妻之子每居已生之上宦學婚嫁莫不為防
焉故虐之異姓寵則父母被怨繼親虐則兄弟為讎家
有此者皆門戶之禍也 生民之本要當稼穡而食桑
麻以衣蔬果之蓄園場之所產雞豚之善埒圈之所生

爰及棟宇器械樵薪脂燭莫非種植之物也至能守其
業者閉門而為生之具以足但家無鹽井耳今北土風
俗率能躬儉節用以贍衣食江南奢侈多不逮焉世
間名士但務寬仁至於飲食饌饋僮僕減損施惠然諾
妻子節量狎侮賓客侵耗鄉黨此亦為家之巨蠹矣
婦主中饋唯事酒食衣服之禮耳國不可使預政家不
可使幹蠱如有聰明才智識達古今正當輔佐君子助
其不足必無牝雞晨鳴以致禍也江東婦女略無交

遊其婚姻之家或十數年間未有識者唯以信命贈遺
致殷勤焉鄴下風俗專以婦持門戶爭訟曲直造請逢
迎車乘填街衢綺羅盈府寺代子求官為夫訴屈此乃
恒代之遺風乎 太公曰養女太多一費也陳蕃云盜
不過五女之門女之為累亦以深矣然天生蒸民先人
傳體其如之何世人多不舉女賊行骨肉如此而望福
於天乎 諺云婦人之性率寵子壻而虐兒婦寵壻則
兄弟之怨生焉虐婦則姊妹之讒行焉然則女之行留

皆得罪於其家者毋實為之至有諺云落索阿姑食此其相報也家之常弊可不戒哉 近世嫁娶有賣女納

財買婦輸絹比量父祖計較鎰銖責多還少市井無異或猥壻在門或傲婦擅室貪榮求利返招羞耻可不慎歟 借人典籍皆須愛護先有缺壞就為補治此亦士大夫百行之一也濟陽江祿讀書未竟雖有急速必待卷束整齊然後得起故無損敗人不厭其求假焉或有狼籍几案分散部秩多為童幼婢妾之所點汙風雨犬

鼠之所毀傷實為累德吾每讀聖人之書未嘗不肅敬對之其故紙有五經詞義及賢達姓名不敢穢用也

吾家巫覡符章絕於言議汝曹所見勿為妖妄 俗云

辰日不哭哭則重喪今無教者辰日有喪不問輕重舉家清謐不敢發聲以辭弔客 昔者周公一沐三握髮

一飯三吐飧以接白屋之士一日所見七十餘人晉文公以沐辭豎頭湏致有圖反之誚門不停賓古所貴也失教之家閭寺無禮或以主君寢食嗔怒拒客未通江

南深以為耻黃門侍郎裴之禮號善為士大夫有如此輩對賓杖之其門生僮僕接於他人折旋俯仰辭色應對莫不肅敬與主無別也用其言棄其身古人所恥凡有一言一行取於人者皆顯稱之不可竊人之美以為已力雖輕雖賤必歸功焉竊人之財刑辟之所處竊人之美鬼神之所責士大夫子弟數歲已上莫不被教多者或至禮傳少者不失詩論及至冠婚體性稍定因此天機倍須訓誘有志尚者遂能磨礪以就素業無

履立者自茲惰慢便為凡人生在世會當有業農民則計量耕稼商賈則討論貨賄工巧則致精器用伎藝則沉思法術武夫則慣習弓馬文士則講議經書多見士大夫恥涉農商羞務工伎射既不能穿札筆則纔記姓名飽食醉酒忽忽無事以此銷日以此終年或因家世餘緒得一階半級便謂為足安能自苦及有吉凶大事議論得失蒙然張口如坐雲霧公私宴集談古賦詩塞默低頭欠伸而已有識傍觀代其入地何惜數年勤學

長受一生愧辱哉 梁朝全盛之時貴遊子弟多無學
術至於諺云上車不落則著作體中何如則祕書無不
薰衣剃面傅粉施朱駕長簷車跟高齒屐坐碁子方褥
憑班絲隱囊列器玩於左右從容出入望若神仙明經
求第則雇人答策三九公讌則假手賦詩當爾之時亦
快士也及離亂之後朝市遷革銓衡選舉非復曩者之
親當路秉權不見昔時之黨求諸身而無所得施之世
而無所用披褐而喪珠失皮而露質兀若枯木泊若窮

流孤獨戎馬之間轉死溝壑之際當爾之時誠駕材也
有學藝者觸地而安自荒亂已來諸見俘虜雖百世
小人知讀論語孝經者尚為人師雖千載冠冕不曉書
記者莫不耕田養馬以此觀之安可不自勉耶若能常
保數百卷書千載終不為小人也 夫明六經之指涉
百家之書縱不能增益德行敦厲風俗猶為一藝得以
自資父兄不可常依鄉國不可常保一旦流離無人庇
蔭當自求諸身耳諺曰積財千萬不如薄技在身而況

易習而可貴者無過讀書也世人不問愚智皆欲識人之多見事之廣而不肯讀書是猶求飽而懶營饌欲暖而惰裁衣也夫讀書之人自羲農已來宇宙之下凡識幾人凡見幾事生民之成敗好惡固不足論天地所不能藏鬼神所不能隱也人見隣里親戚有佳快者使子弟慕而學之不知使學古人皆其蔽也世人但知跨馬被甲長稍強弓便云我能為將不知明乎天道辨乎地利比量逆順鑒達興亡之妙也但知承上接下積

財聚穀便云我能為相不知敬鬼事神移風易俗調節
陰陽薦舉賢聖之至也但知私財不入公事夙辦便云
我能治民不知誠已型物執轡如組反風滅火化鴟為
鳳之術也但知抱令守律早刑晚舍便云我能平獄不
知同轅觀罪分劔追財假言而姦露不問而情得之察
也爰及農商工賈廝役奴隸釣魚屠肉飯牛牧羊皆有
先達可為師表博學求之無不利於事也 夫所以讀
書學問本欲開心明目利於行耳未知養親者欲其觀

古人之先意承顏怡聲下氣不憚劬勞以致甘腴惕然
慙懼起而行之也未知事君者欲其觀古人之守職無
侵見危授命不忘誠諫以利社稷惻然自念思欲效之
也素驕奢者欲其觀古人之恭儉節用卑以自牧禮為
教本敬者身基矧然自失歛容抑志也素鄙悵者欲其
觀古人之貴義輕財少私寡慾忌盈惡滿調窮卹匱報
然悔耻積而能散也素暴悍者欲其觀古人之小心黜
已齒敝古存含垢藏疾尊賢容衆藹然沮喪若不勝衣

也素怯懦者欲觀古人之達生委命強毅正直立言必
信求福不回勃然奮厲不可恐懾也歷茲以往百行皆
然縱不能淳去泰去甚學之所知施無不達世人讀書
但能言之不能行之武人俗吏所共嗤詆良由是耳人
讀數十卷書便自高大凌忽長者輕慢同列人疾之如
讎敵惡之如鴟梟如此以學求益今反自損不如無學
也 田里間人音辭鄙陋風操蚩拙相與專固無所堪
能問一言輒酬數百責其指歸或無要會鄴下諺云博

士買驢書券三紙未有驢字使汝以此為師令人氣塞
孔子曰學也祿在其中矣今勤無益之事恐非業也

何晏王弼祖述元宗遞相誇尚景附草靡皆以農黃之
化在乎已身周孔之業弃之度外而平叔以黨曹爽見
誅輔嗣以多笑人被疾山巨源以蓄積取譏夏侯元以
才望被戮嵇叔夜以排俗取禍郭子元以傾動權勢阮
嗣宗沈酒荒迷謝幼輿賊賄黜削彼諸人者並其領袖
元宗所歸其餘桎梏塵滓之中顛仆名利之下者豈可

備言乎直取其清談高論剖元析微賓主徃復怡心悅耳非濟世成俗之要也 吾見世人清名登而金貝入信譽顯而然諾虧不知後之矛戟毀前之干櫓也宓子賤云誠於此者形於彼人之虛實真偽在乎心無不見乎迹但察之未熟耳一為察之所鑒巧偽不如拙誠承之以羞大矣伯石讓卿王莽辭政當於爾時自以巧密後人書之留傳萬代可為骨寒毛豎也 夫君子之處世貴能有益於物耳不徒高談虛論左琴右書以費人

君祿位也國之用材大較不過六事一則朝廷之臣取其鑒達治體經綸博雅二則文史之臣取其著述憲章不忘前古三則軍旅之臣取其斷決有謀強幹習事四則藩屏之臣取其明練風俗清白愛民五則使命之臣取其識變從宜不辱君命六則興造之臣取其程功節費開略有術此則皆勤學守行者所能辨也人性有長短豈責其美於六塗哉但當皆曉指趣能守一職便無愧耳 吾見世中文學之士品藻古今若指諸掌及有

試用多無所堪居承平之世不知有喪亂之禍處廟堂之中不知有戰陣之急保奉祿之資不知有耕稼之苦肆吏民之上不知有勞役之勤故難可以應世經務也古人欲知稼穡之艱難斯蓋貴穀務本之道也夫食為民天民非食不生矣三日不粒父子不能相存耕種之蓀鉏之刈穫之載積之打拂之簸揚之凡幾涉手而入倉廩安可輕農事而貴末業哉江南朝士因晉中興而渡江本為羈旅至今八九世未有力田悉資俸祿而

食耳假令有者皆信僮僕為之未嘗目觀起一墪土耘一株苗不知幾月當下幾月當收安識世間餘務乎故治官則不了營家則不辦皆優閑之過也 諫諍之徒以正人君之失爾必在得言之地當盡匡贊之規不容苟免偷安垂頭塞耳至於就養有方思不出位干非其任斯則罪人故表記云事君遠而諫則諂也近而不諫則尸利也論語曰未信而諫人以為謗已也 君子當守道崇德蓄價待時爵祿不登信由天命須求趨競不

顧羞慙比較才能斟量功伐厲色揚聲東怨西怒或有
劫持宰相瑕疵而獲酬謝或有諠聒時人視聽求見發
遣以此得官謂為才力何異盜食致飽竊衣取溫哉

世見躁競得官者便為弗索何獲不知時運之來不索
亦至矣見靜退未遇者便為弗為胡成不知風雲不與
徒求無益也 禮云欲不可縱志不可滿宇宙可臻其
極情性不知其窮唯在少欲知足為立涯限爾先祖靖
侯戒子姪曰汝家書生門戶世欲富貴自今仕宦不可

過二千石婚姻勿貪勢家吾終身服膺以為名言也

自亂離已來吾見名臣賢士臨難求生終為不救徒取
窘辱令人憤懣侯景之亂王公將相多被戮辱妃主姬
妾略無全者唯吳郡太守張嶷建義不捷為賊所害辭
色不撓及鄱陽王世子謝夫人登屋詬怒見射而斃夫
人謝遵女也何賢智操行若此之難婢妾引決若此之
易悲夫 醫方之事取妙極難不勸汝曹以自命也微
解藥性小小和合居家得以救急亦為勝事皇甫謐殷

仲堪則其人也

唐柳玭序訓

為御史大夫按玭京兆華原人太保公綽之孫僕射仲郢之第四子昭

宗時官御史大夫

先祖河東節度使公綽在公卿間最名有家法中門東有小齋自非朝謁之日每平旦輒出小齋諸子皆束帶晨省於中門之北公綽決私事接賓客與弟公權及羣從弟再會食自旦至暮不離小齋燭至則命子弟一人執經史躬讀一過訖乃講議居官治家之法或論文聽

琴至人定鐘然後歸寢諸子復昏定於中門之北凡二十餘年未嘗一日變易其遇饑歲則諸子皆蔬食曰昔吾兄弟侍先君為丹州刺史以學業未成不聽食肉吾不敢忘也祖母韓夫人相國休之曾孫相國滉之孫僕射貞公舉之長女家法嚴肅儉約為搢紳家楷範歸我家三年無少長未嘗見啟齒貞公在省為僕射先公於襄陽加端揆常衣絹素不用綾羅錦繡貞公親仁里有宅每歸覲不乘金碧輿祇乘竹兜子二青衣步履以隨

貞公歎乃御下之儉也常命粉苦參黃連熊膽和為丸
賜先公及諸叔每永夜習學含之以資勤苦先公居
外藩先公每入境郡邑未嘗知既至每出入常於戟門
外下馬呼幕賓為丈皆許納拜未嘗笑語款洽牛相國
辟為武昌從事動遵禮法奇章公歎曰非積習名教不
及此先公以禮律身居家無事亦端坐拱手出內齋
未嘗不束帶三為大鎮廐無良馬衣不薰香公退必讀
書手不釋卷家法在官不奏祥瑞不度僧道不貸職吏

法凡理藩府急於濟貧卹孤有水旱必先期假貸廩粟
軍食必精豐逋租必貫免館傳必增飾宴賓犒軍必華
盛而交代之際倉儲帑藏必盈溢於始至境內有孤貧
衣纓家女及笄者皆為選壻出俸金為資裝嫁之 叔
祖少保公權字誠懸玘兄弟嘗從諸季父送別東郊僕
馬在門會陰晦多雨具少保因言我少時家貧當房嚴
訓年十六當房往鮑陂人家致祭處分先往撰文時甚
雪祇得一驢女家人清淨隨後得一破褥子披至鮑陂

為莊客所哀為燔薪得附火為文寫上板子當房朝下
到莊呈祝版此時免科責便滿望豈暇知寒今日雖散
退還得爾許官爾等作得祭文者有幾人皆乘馬有油
衣吾為爾等憂太保曉聲律而不好樂常云聞樂令人
驕惰先妣韋夫人外王父相國文公貫之奕世以貞
諒峻鯁稱先夫人事君舅君姑凡十一年晨省於鷄鳴
昏定於初夕未嘗闕梁國夫人有疾先夫人一月不下
堂早夜奉養疾愈始歸院文公及第登諫科判入高等

授長安尉秩滿困窮穴地燔薪噉豆糜以禦冬 孝公
房舅謂余弟兄曰爾家雖非鼎甲然中外名德冠冕之
盛亦可謂華腴右族玘自聞此言刻骨畏懼夫門地高
可畏不可恃可畏者立身行已一事有墜先訓則罪大
於他人雖生可以苟取爵位死亦不可見祖先於地下
不可恃者門高則自驕族盛則為人窺嫉實藝懿行人
未必信纖瑕微累十手爭指矣所以承地胄者修已不
得不懇為學不得不堅 夫士君子生於世已無能而

望他人用之已無善而望他人愛之亦猶農夫鹵莽種
之而怨大澤之不潤雖欲弗餒其可得乎余幼時每聞
先公僕射與太保房叔祖講論家法莫不言立已以孝
弟為基以恭默為本以畏怯為務以勤儉為法以交結
為末事以氣焰為凶人肥家以忍順保交以簡敬百行
備矣體之未臧三緘密慮言之或失廣記如不及求名
如儻來去恡與驕庶幾寡過莅官則潔已省事而後可
以言守法守法而後可以言養人直不近禍庶不沽名

廩祿雖微不可易黎甿之膏血榷楚雖用不可恣徧狹
之胷襟憂與禍不偕潔與富不竝 余又比見名家子
孫其祖先正直當官耿介特立不畏彊禦者及其衰也
則但有暗劣莫知所宗此際幾微非賢不達 夫壞名
災已辱先喪家其失有尤大者五宜深記之一是自求
安逸靡甘淡泊苟便於己不恤人言二是不知儒術不
閑古道懵前經而不耻論當世而解頤自無學業惡人
有學三是勝己者厭之佞己者悅之唯樂戲談莫思古

道聞人之善嫉之聞人之惡揚之浸漬頗僻銷削德義
簪裾徒在廝養何殊四是崇好慢游耽嗜麴蘖以銜盃
為高致以勤事為俗人習之易荒覺已難悔五是急於
名宦暱近權要一資半級雖或得之衆怒羣猜鮮有存
者茲五不韙甚於瘞疽瘞疽則砭石可瘳五失則神醫
莫理前朝炯戒方冊具存近世覆車聞見相接 夫中
人已下修詞力學者則躁進患失思展其用審命知退
者則業荒文蕪一不足操唯智者研其慮博其聞堅其

習精其業用之則行舍之則藏苟異於斯孰為君子

余自幼奉嚴訓實自懇剋不敢以資基冒進分為州邑
冗吏未嘗以一言求伸於公卿間今優游清切乃踰心
期至於披閱墳史研味祕奧猶惜寸陰不知老之將至
噫君臣父子之道禮樂刑政之規在於儒術是乃本源
夫以憂虞疾疢有限之年自少及衰從旦至暮孜孜於
本教之事尚不得一二矧以他事撓之耶 語曰不有
博奕者乎為之猶賢乎已此一章意義全在已字已者

飽食終日無所用心之人也如是者心智昏懶兼不及於博奕夫子以博奕為喻者乃深切於戒勸明言博奕為鄙事非許儒學不務經術但博奕耳吳宮之論可為格言近者又有葉子戲或聞其名本起婦女既鄙於握槊乃賭錢之流手執青蚨坐銷白日進德修業其若是乎夫世族之源長慶遠與命位之豐約否泰不假問著龜不假徵星數處心行事而已今昭國里崔山南昆弟子孫之盛鄉族罕比山南曾祖母長孫夫人年高無

齒祖母唐夫人事姑孝每旦櫛縱笄拜於階下即升堂
乳其姑長孫夫人不粒食數年而康寧一日疾病長幼
咸萃宣言無以報新婦恩願新婦有子有孫皆得如新
婦孝敬則崔之門安得不昌大乎 今東都仁和里裴
尚書寬子孫衆盛實為名閥天后時宰相魏元同選尚
書之先為長壻未成婚而魏陷羅織獄一家徙於嶺表
來俊臣輩既死始霑恩還北魏之長女已踰笄及湖外
其家議北裴必不復求婚淪落貧窶無以為衣食資詣

老比丘尼祈披緇居其寺女亦甘願下髮有日矣有客
尼自外至聞其議曰一見魏氏女可乎見之曰此女俗
福豐厚必有令匹子孫將徧天下宜事北歸言訖而去
遂不敢議及荆門則裴自京洛賫資聘俟魏氏之北反
已數月矣今勢利之徒奉權倖如不及捨信誓如反掌
則裴之蕃衍乃天之報施也鄭司徒言於河南文公云
裴某作刺史兒女皆飯餅餌人言其為吏清白與周給
親愛不可不信矣 余季妹適宏農楊堪在蔣相國幕

清刻自持屬吏有饋獻皆不納嘗言不唯自清抑亦內助焉余舊府高公先侍郎兄弟三人俱居清列非速客不二羹臠夕食齏菹而已皆保重名於世永寧王

相國

按王相涯

方居相位掌利權竇氏女歸請曰玉工貨一

釵奇巧須七十萬錢王曰七十萬我一月俸金爾豈於女惜但一股釵七十萬此妖物也必與禍相隨女不復敢言數月女自婚姻會歸告王曰前時釵為馮外郎妻首飾矣乃馮球也王歎曰馮為郎吏妻之首飾有七十

萬錢其可久乎其善終乎馮為賈相門人最密

按賈相諫賈


為東戶又取為屬郎賈有蒼頭頗張威福馮於賈忠將發之未能賈入相馮一日遇蒼頭於門召而勗之曰戶部中謗詞不一苟不悛必告相國奴泣拜謝而去未浹旬馮晨與賈未興時方命設火內齋曰冠當出俄有二青衣賁銀罍出曰相公恐員外寒命奉地黃酒三杯馮悅盡舉之青衣入馮出告其僕御曰渴且咽粗能言其事食頃而終賈為馮興歎出涕竟不知其由又明年王

賈皆遘禍噫王以珍玩奇貨為物之妖信知言矣而徒知物之妖而不知恩權隆赫之妖甚於物邪馮以卑位貪寶貨已不能正其家盡忠所事而不能保其身斯亦不足言矣賈之臧獲害門客於牆廡之間而不知欲始終富貴其可得乎此雖一事作戒數端又李相國泌居相位請徵陽道州為諫議大夫陽既至亦甚銜恩未幾李薨於相位其子繁居喪與陽並居陽將獻䟽斥裴延齡之惡嗜酒目昏以恩故子弟待繁召之寫䟽繁彊

記絕筆誦於口錄以呈延齡遞奏之云城將此疏行於
朝數日矣道州疏入德宗已得延齡藁震怒俄斥道州
竟不反繫後為譙郡守虐誅巨盜不以法舒相元輿布
衣時以文贄繫繫曰自此有一舒家銜之及為御史鞠
譙獄入繫罪不可解數年舒亦及禍今世人各盛言宿
業報應之說曾不思視履考祥之事不其惑歟 余又
見名門右族莫不由祖考忠孝勤儉以成立之莫不由
子孫頑率奢傲以覆墜之成立之難如升天覆墜之易

如燎毛言之痛心爾宜刻骨 又余家世本以學識禮
法稱於士林間比見諸家於吉凶禮制有疑文者多取
正焉喪亂以來門祚衰落清風素範有不絕如綫之慮
當禮樂崩壞之際荷祖先名教之訓弟兄兩人年將中
壽基構之重屬於後生纂續則貧賤為榮墮墜則富貴
可耻今所紀舊事十忘三四晝覽而夜思棲心講求觸
類滋長夫行道之人德行文學為根株正直剛毅為柯
葉有根無葉按有根無葉四字原本
脫去今從新唐書增入或可俟時有葉無

根膏雨所不能活也苟惜斯理欲紹家聲則今之流傳
反成災害諦聽熟念以保令名至於孝慈友悌忠信篤
行乃食之醯醬不可一日無也豈必言哉比史官皆有
序傳以紀宗門余初及行在尚守左史故敢以序訓為
目



欽定四庫全書

子部

戒子通錄卷四

詳校官中書

臣張虎拜

刑部郎中

臣

許兆椿覆勘

膳錄監生

臣

朱起鳳

欽定四庫全書

戒子通錄卷三

宋 劉清之 撰

幼訓

王褒

臨沂人周小司空著幼訓以戒諸子其一章云

按褒字子深周武帝保

定中除內史中大夫

陶士行曰昔大禹不恡尺璧而重寸陰文士何不誦書
武士何不馬射若乃元冬修夜朱明長日肅其居處崇
其牆仞門無糅雜坐闕號呶以之求學則仲尼之門人
也以此為文則賈生之升堂也古者盤盂有銘几杖有

戒進退修焉俯仰觀焉立身行道終始若一造次必於是君子之言歟吾自幼學不墜斯業汝能修之吾之志也

曾子告子言

參字子與魯人疾病告曾元曾華凡三章

微乎吾無夫顏氏之言吾何以語汝哉然而君子之務盡有之矣夫華繁而實寡者天也言多而行寡者人也鷹隼以山為卑而曾巢其上魚鼈黿鼉以淵為淺而燮穴其中卒其所以得之者餌也是故君子苟無以利害

義則辱何由至哉 親戚不悅不敢外交近者不親不敢求遠小者不審不敢言大故人之生也百歲之中有疾病焉有老幼焉故君子思其不復者而先施焉親戚既殆雖欲孝誰為孝年既耆艾雖欲弟誰為弟故孝有不及弟有不時其此之謂與 官怠於宦成病加於少愈禍生於懈惰孝衰於妻子察此四者慎終如始詩曰靡不有初鮮克有終

史鰌

字子魚衛靈公臣且死謂其子曰靈公往乎問其故其子以父言聞靈公寤衛國以治

我即死治喪於北堂吾生不能進遽伯玉而退彌子瑕不能正君也生不能正君死不當成禮死而置屍於北堂於禮足矣

司馬談

談漢太史令夏陽人留滯周南發憤且卒執子遷手而泣曰

予先周室之太史也自上世嘗顯功名于虞夏典天官事後世中衰絕於予乎女復為太史則續吾祖矣今天子接千歲之統封泰山而予不得從行是命也夫命也夫予死汝必為太史為太史毋忘吾所欲論著矣且夫

孝始於事親中於事君終於立身揚名於後世以顯父
母此孝之大者夫天下稱誦周公言其能論歌文武之
德宣周召之風達太王王季之思慮爰及公劉以尊后
稷也幽厲之後王道缺禮樂衰孔子修舊起廢論詩書
作春秋則學者至今則之自獲麟以來四百有餘歲而
諸侯相兼史記放絕今漢興海內一統明主賢君忠臣
義士予為太史而不論載廢天下之文予甚懼焉汝其
念哉

何曾

字穎考陽夏人晉司徒嘗侍武帝宴退告其子遵曰

國家應天受命創業垂統吾每侍宴未嘗聞經國遠圖
唯說平生常事非詒厥孫謀之道也後嗣其殆乎此吾
子孫之憂汝等猶可沒身孫輩必遇亂亡

殷仲堪

陳郡人晉荊州刺史性真素飯粒落席間輒拾以噉之

人見我受任方州謂我豁平昔時意今吾處之不易貧
者士之常焉得登枝而捐其本爾其存之

謝僑

字國美父元大任梁侍中

僑素貧嘗一日朝無食其子啓欲以班史質錢答曰寧餓死豈可以此充食乎

劉贊

魏州人父玘為縣令按贊後唐明宗時為御史中丞刑部侍郎

贊始就學衣以青布衫襦每食則玘自肉食而別以蔬食食贊於牀下謂之曰肉食君之祿也爾欲之則勤學問以干祿吾肉非爾之食也由是贊益力學舉進士官至中書舍人

疏廣告兄子言

字仲翁東漢人漢太子太傅兄子受字公子為少傅廣告之受叩頭

曰從大
人議

吾聞知足不辱知止不殆功遂身退天之道也今仕宦
至二千石官成名立如此不去懼有後悔豈如父子相
隨出關以壽命終不亦善乎

孔臧戒子書

子順之後安國之從兄事漢孝武告
子琳書按臧孔子十一代孫嗣封

蒙侯為

太常

頃來聞汝與諸友生講肄書傳

按孔叢子作
講肄學傳

孜孜晝夜

衍衍不急善矣人之進退唯問其志取必以漸勤則得

多山雷至柔石為之穿蜴蟲至弱木為之弊夫雷非石之鑿蜴非木之鑽然而能以微脆之形陷堅剛之體豈非積漸之致乎訓曰徒學知之未可多履而行之乃足佳

東方朔

字曼倩平原人漢武帝臣似道家言姑存之

明者處世莫尚於中優哉游哉與道相從首陽為拙柳惠為工飽食安步以仕代農

鄭元

字康成北海人漢獻帝時嘗疾篤自慮以書戒子益恩

吾家舊貧不為父母羣弟所容去廝役之吏游學周秦之都徃來幽并充豫之役獲覲乎在位通人處逸大儒得意者咸從捧手有所受焉遂博稽六藝粗覽傳記時覩祕奧年過四十乃歸供養假田播殖以娛朝夕遇閤尹擅勢坐禁黨錮十有四年而蒙赦令舉賢良方正有道辟大將軍三司府公車再召比牒併名早為宰相惟彼數公懿德大雅克堪王臣故宜式序吾自忖度無任於此但念述先聖之元意思整百家之不齊亦庶幾以

竭吾才故聞命罔從而黃巾為害萍浮南北復歸邦鄉
入此歲來已七十矣宿素衰落仍有失誤案之禮典便
合傳家今我告爾以老歸爾以事將閒居以安性覃思
以終業自非拜國君之命問族親之憂展敬墳墓觀省
野物胡嘗扶杖出門乎家事大小汝一承之咨爾瑩瑩
一夫曾無同生相依其勗求君子之道研鑽勿替敬慎
威儀以近有德顯譽成於僚友德行立於己志若致聲
稱亦有榮於所生可不深念邪可不深念邪吾雖無紱

冕之緒頗有讓爵之高自樂以論贊之功庶不遺後人
之羞末所憤憤者徒以亡親墳壟未成所好羣書率皆
腐敝不得於禮堂寫定傳與其人日西方暮其可圖乎
家令差多於昔勤力務時無恤饑寒菲飲食薄衣服節
夫二者尚令吾寡恨若忽忘不識亦已焉哉

劉向

字子政彭城人漢成帝臣

汝有何德蒙恩甚厚將何以報董生有云吊者在門賀
者在閭言有憂則恐懼敬事故事則必有善功而福至

也又曰賀者在門弔者在閭言受福則驕奢驕奢則禍
至故弔隨而來齊頃公之始藉霸者之餘威輕侮諸侯
戲跛蹇之客故被鞶之禍遁服而亡所謂賀者在門弔
者在閭也兵敗師破人皆弔之恐懼自新百姓愛之晉
侯皆歸其所奪邑所謂弔者在門賀者在閭也

司馬徽

後漢

聞汝充役室如懸磬何以自辦論德則吾薄說居則吾
貧勿以薄而志不壯貧而行不高也

王修

字叔治北海人
魏奉常戒子

自汝行之後恨恨不樂何者我實老矣所恃汝等也皆不在目前意遑遑也人之居世忽去便過日月可愛也故禹不愛尺璧而愛寸陰時過不可還若年大不可少也欲汝早成未必讀書并學作人欲令見舉動之宜觀高人遠節志在善人左右不可不慎善否之要在此際也行止與人務在謹之言思乃出行詳乃動皆用情實道理違斯敗矣父欲令子善唯不能殺身其餘無惜也

王昶

字文舒魏司空名兄子默字處靜沈字處道子渾字元冲深字道冲皆依謙實以見意遂

書以
戒之

夫人為子之道莫大於寶身全行以顯父母此三者人知其善而或危身破家陷於滅亡之禍者何也由所祖習非其道也夫孝敬仁義百行之首行之乃立身之本也孝敬則宗族安之仁義則鄉黨助之此行成於內名著於外者矣人若不篤於至行而背本逐末以陷浮華焉以成朋黨焉浮華則有虛偽之累朋黨則有彼此之

患此二者之戒昭然著明而循覆轍滋衆逐末彌甚皆由感常時之譽昧目前之列故也 夫富貴聲名人情

所樂而君子或得而不處何也惡不由其道耳患人知

進而不知退知欲而不知足故有困辱之累悔吝之咎

語曰如不知足則失所欲故知足之足常足矣覽往事

之成敗察將來之吉凶未有干名要利欲而不厭而能

保世持家永全福祿者也

按魏志王粲傳此下尚有欲使汝曹立身行己遵儒者之

教履道家之言故共十九字

以元默冲虛為名欲使汝曹顧名思義

不敢違越也古者盤杆有銘几杖有戒俯仰察焉用無
過行況在己名可不戒之哉夫物速成則疾亡晚就
則善終朝華之草夕而零落松柏之茂隆寒不衰是以
大雅君子惡速成戒闕黨也若范燮對秦客而武子擊
之折其委筭惡其掩人也夫人有善鮮不自伐有能寡
不自矜伐則掩人矜則凌人掩人者人亦掩之凌人者
人亦凌之故三郤為戮於晉王叔負罪於周不惟矜善
自伐好爭之咎乎故君子不自稱非以讓人惡其蓋人

也夫能屈以為伸讓以為得弱以為彊鮮不遂矣夫
毀譽愛惡之原而禍福之機也是以聖人慎之孔子曰
吾之於人誰毀誰譽如有所譽必有所試又曰子貢方
人賜也賢乎哉我則不暇以聖人之德猶尚如此況庸
庸之徒而輕毀譽哉昔伏波將軍馬援戒其兄子言聞
人之惡當如聞父母之名耳可得而聞口不可得而言
也斯戒至矣人或毀已當退而求之於身若已有可毀
之行則彼言當矣若已無可毀之行則彼言妄矣當則

無怨於彼妾則無害於身又何反報焉且聞人毀已而
忿者惡醜聲之加人也人報者滋甚不如默而自修已
也諺曰救寒莫如重裘止謗莫如自修斯言信矣若與
是非之士凶險之人近猶不可況與對校乎其害深矣
夫虛偽之人言不根道行不顧言其為浮淺較可識
別而世人惑焉猶不檢之以言行也近濟陰魏諷山陽
曹偉皆以傾邪敗沒熒惑當世挾持姦慝驅動後生雖
刑於鈇鉞大為炯戒然所汙染固以衆矣可不慎與

若夫山林之士夷叔之倫甘長饑於首陽安赴火於縣
山雖可以激貪礪俗然聖人不可為吾亦不願也今汝
先人世有冠冕惟仁義為名守慎為稱孝悌於閭門務
學於師友 吾與時人從事雖出處不同然各有所取
潁川郭伯益好尚通達敏而有知其為人宏曠不足輕
貴有餘得其人重之如山不得其人忽之如草吾以所
知親之昵之不願兒子為之北海徐偉長不治名高不
求苟得澹然自守惟道是務其有所是非則托古人以

見其意當時無所褒貶吾敬之重之願兒子師之東平
劉公幹博學有高才誠節有大意然性行不均少所拘
忌得失足以相補吾愛之重之不願兒子慕之樂安任
昭先淳粹履道內敏外恕推遜恭讓處不避澆怯而義
勇在朝忘身吾友之善之願兒子遵之若引而伸之觸
類而長之汝其庶幾舉一隅耳及其用財先九族其
施舍務周急其出入存故老其論議貴無貶其進仕尚
忠節其取人務道實其處勢戒驕淫其貧賤慎無戚其

進退念合宜其行事加九思如此而已吾復何憂哉

諸葛亮家戒

字孔明瑯琊人蜀漢丞相戒子書與子疏凡三章

君子之行靜以修身儉以養德非澹泊無以明志非寧靜無以致遠夫學須靜也才須學也非學無以廣才非靜無以成學慆慢則不能研精險躁則不能理性年與時馳意與歲去遂成枯落悲歎窮廬將復何及也 又云每得來疏書尚麤拙豈修之不勤而量之有限耶又云夫志當存高遠慕先賢絕情欲棄凝滯使庶幾之

志揭然有所存惻然有所感忍屈伸去細碎廣咨問除
嫌吝雖有淹留何損於美趣何患於不濟若志不強毅
意不慷慨徒碌碌滯於俗默默束於情永竄伏於凡庸
不免於下流矣

羊祜

字叔子泰山人晉征南大將軍無子詔以兄子暨暨弟伊伊弟篇為祜後戒書出歐陽詢

吾少受先君之教能言之年便召以典文年九歲便誨
以詩書然尚猶無鄉人之稱無清異之名今之職位謬
恩之加耳非吾力所能致也吾不如先君遠矣汝等復

不如吾諮度宏偉恐汝兄弟未能也奇異獨達察汝等
將無分也恭為德首慎為行基願汝等言則忠信行則
篤敬無口許人以財無傳不經之談無聽毀譽之語聞
人之過耳可得受口不得宣思而後動若言行無信身
受大謗自入刑論豈復惜汝恥及祖考思乃父言纂乃
父教各諷誦之

商裒

晉人 按商裒即殷裒宋人避
諱所改也曾為滎陽令有惠政

天道也者易尋而難窮易知而難行也故京房之徒考

步吉凶之變而不能自見其禍更為姚平所戒此道之
難知也省爾之才不及於房而吾之言過於平矣昔弗
父何三命滋恭晏平仲久而敬之曾顏之徒有若無實
若虛也况爾析薪之智欲彈射世俗身為謗先怨禍並
集使吾懷朝夕之憂為范武子所歎亦非汝之美也若
朝益暮習先人後已恂恂如也則吾聞音而識其曲食
旨而知其甘永終吾餘年矣復何恨哉古人有言思不
出其位爾其念之爾其念之

司馬越

晉東海王以王承為記室參軍雅相知重勅其子毗

大學之所益者淺體之所安者深閑習禮度不如式瞻
儀型諷味遺言不若親承音旨王參軍人倫之表汝其
師之

李嵩

字元盛隴西人晉涼武昭王遷于酒泉手令戒其諸子

吾自立身不營世利經涉累朝通否任時初不役智有
所要求今日之舉非本願也然事會相驅遂荷州土憂
責不輕門戶事重雖詳人事未知天心登車攬轡百慮

填胃後事付汝等粗舉旦夕近事數條遭意便言不能
次比至於杜漸防萌深識情變此當任汝所見深淺非
吾勅戒所盡也汝等雖年未至大若能克己纂修比之
古人亦可以當事業矣苟其不然雖至白首亦復何成
汝等其戒之慎之節酒慎言喜怒必思愛而知憎惡而
知善動念寬恕審而後與衆之所惡勿輕承信詳審人
核真偽遠佞諛近忠正

按晉書
作忠臣

蠲刑獄忍煩擾存高年

恤喪病勤省按聽訟訴刑法所應和顏任理慎勿以情

輕加聲色賞勿漏疎罰勿容親耳目人間知外患苦禁

御左右無作威福勿伐善施勞逆詐意必

按晉書作億必

以示

已明廣加諮詢無自專用從善如順流去惡如探湯富

貴而不驕者至難也念此貫心勿忘須臾寮佐邑宿盡

禮承敬譙饗饌食事事留懷古今成敗不可不知退朝

之暇究觀典籍面牆而立不成人也此郡世篤忠厚人

物敦雅天下全盛時海內猶稱之况復今日實是名邦

正為五百年鄉黨婚親相連至於公理時有小小頗廻

為當隨宜斟酌吾臨莅五年兵難騷動未得休衆息後
惠康士庶至於掩瑕藏疾滌除疵垢朝為冠讎夕委心
膺雖未足希準古人粗亦無負於新舊事任公平坦然
無類初不容懷有所損益計近便為少經遠如有餘亦
無愧於前志也

陳顯達

宋孝武世以軍主歷驅使南齊遷都督江州諸軍事自以人微位重每遷官有愧懼

之色諸子多事豪侈顯達聞之不悅子休尚為
郢府主簿過九江戒之按顯達南彭城人

我本志不及此汝等勿以富貴凌人麈尾蠅拂是王謝

家物汝不須捉此即取於前焚之

王僧虔

琅琊人仕齊為儀同宋世嘗有書戒子

吾在世雖乏德素要復推排人間十許年故是一舊物
人或以比數汝耳即化之後若自無調度誰復知汝事
者舍中亦有少負令譽弱冠越超清級者于時王家門
中優者龍鳳劣猶虎豹失蔭之後豈龍虎之儀况吾不
能為汝蔭政應各自努力耳或有身經三公茂爾無聞
布衣寒素卿相屈體父子貴賤殊兄弟聲名異何也體

盡讀數百卷書耳吾今悔無所及亦以前車戒爾後乘也汝年入立境方應從宦兼有室累何處復得下帷如王郎時邪各爾身已切豈復關吾邪鬼唯知愛深松茂柏寧知子弟毀譽事因汝有感故略叙胃懷

徐勉戒子書

字修仁東海人梁武帝臣戒其子崧其略曰

吾家本清廉故常居貧素至於產業之事未嘗經營薄躬遭逢遂至今日仰藉門風故臻此爾古人所謂以清白遺子孫不亦厚乎中年聊於東田開營小園者非播

甄以要利政欲穿池種樹少寄情賞聞汝所買湖田甚為烏鹵有所收穫汝可自分贍內外大小宜令得所又復應需之諸女耳汝既居長故有此及凡為人長殊復不易當使中外諧輯人無間言先物後已然後可貴汝當自勛見賢思齊不宜忽略以棄日也棄日乃是棄身身名美惡豈不大哉可不慎歟今之所教略言此意政謂為家以來不事資產暨立墅舍以垂舊業陳其始末無愧懷抱

王筠

字元禮瑯琊人仕梁為太子詹事與諸子論家門集

史傳稱安平崔氏及汝南應氏並累葉有文才所以范蔚宗云崔氏雕龍然不過父子兩三世耳非有七葉之中名德重光爵位相繼人人有集如吾門者也汝等仰觀堂構思各努力

李恕

唐中宗時縣令以崔氏女儀戒不及男顏氏家訓訓遺於女遂著戒子拾遺十八篇兼教

男女令新婦子孫人寫一通用為鑒戒云

男子六歲教之方名七歲讀論語孝經八歲誦爾雅離

騷十歲出就師傅居宿於外十一專習兩經志學之年
足堪賓貢平翼二子即是其人夫何異哉積勤所致耳
擢第之後勿棄光陰三四年間屏絕人事講論經籍爰
迄史傳並當諳憶悉令上口洎乎弱冠博綜古今仁孝
忠貞溫恭謙順器惟瑚璉材堪廊廟如或出身之後怠
而自逸被服綺羅弄姿顧影朝遊酒肆暮宿倡樓雖則
生之不如過死若狔犬耳奚足惜哉 居九品之中處
百僚之下清勤自勵平真無虧事長官以忠誠接僚友

以謙敬言思乃出行思乃動勿輒有毀譽勿輕論得失
格式律令為政之隄防一牽吏役動遵憲綱與奪割
斷必須理愜條章喜怒刑名豈可率由胃臆枷杖樣式
著於令文準令而行足堪市恥勿奮威怒羸杖大枷肆
一朝之忿取終身之敗 申上移牒言唯謹爾署必真
書慎勿侮弄刀筆譏玩朋僚若犯要司敗不旋踵若輕
同類怨豈在明位下處卑觸塗防謹部內士人虛心接
引鄉中耆望以禮承迎若恣心縱罵輕出莠言罵父子

怨罵兄弟怨既為怨府亦謂深讎劉寬不呵童僕嗣宗
口不臧否韓子曰善為吏者樹德不善為吏者樹怨勉
之勉之縣有長官職宣風化丞尉卑末無勞廣為若
乃斥強健壓雄豪奮下車之威釣高明之譽指揮一縣
專擅六曹識者寒心旁觀啓齒但能正身範物修己安
人不與典吏交言不在公庭妄策立無偏倚坐必正方
人自懷之畏之矣汝輩後生始從卑仕祿俸所獲僅
以代耕宜減省家人謹身節用閭門晝掩鎮安關鑰家

童歛跡無出府廷使馬如羊不以入厩使金如粟不以入懷夫如是則驄馬埋輪且安高枕豈多言之可畏何衆口之能傷哉楊震為涿郡太守子孫皆蔬食步行曰使人稱為清白吏子孫誠哉斯言誓銘肌骨部內交關誠非所願儻緣切要不遑遠市衣食之外無輒交通必須依價錢歸物主分明付領書取文鈔雖云細務易涉流言勿招抑逼之詞以獲侵漁之謗若能遠希先覺遙杜未萌清介皎然吾無憂矣 周生烈云食祿坐觀賊

也老子云債少易償職寡易守汝等欲仕周行深期自
卜審已量分或保微班冒寵貪榮方貽後譴但能績著
鳴絃功彰露冕足隆門閥不墜箕裘豈要榮貴方為宦
達 納采行媒咸求雅對河魴宋子勿墜清規或嫁女
從夫有資賢壻如為男求婦必在甲門無墮百代之規
以適一時之欲 告休暇景公務餘閒學以潤身必資
宏益譙周云聖人學之於天君子學之於聖又云進者
猶行也朝發而異宿矣益者其猶取菜乎勤則頃筐盈

矣家中經史不能周足但能閱市恒有賤書假如數萬
青蚨纔當一馬之直堪得數千黃卷便為百代之寶凡
人皆知市駿馬悅輕肥而莫肯市書見近識小淮南子
云家有三史無癡子可不勉歟 吾昆弟七房子姪尤
衆未出一門已成三從左提右挈洎乎成長世祀云達
恩愛不渝懷橘而歸遺兼諸母易衣而出詎止同胞服
有功總禮經所限情存家法勿或虧焉博徒暴客破產
傾家汝等子孫尤宜戒謹脫子姪之中頑嚚不肖公違

父叔之令輒從輕薄之徒必當斷其擲頭之指以為終身之戒寧不知虧令斷骨忍痛傷心折一指足以保一門所全者大故不隱也 夫酒者所以祀鬼神養病老冠昏之禮非酒不成賓主之歡非酒不接無容沈湎過度顛沛有虧汝等從宦顧惜身名縱不能全然禁斷倍須拘檢酒氣未盡不可參預府庭面色未平不宜呵叱百姓以此為戒餘可知矣 孫叔敖為令尹一老父教之云位益高而意益下官益大而心益小袁子云貧賤

願人之接已富貴忘已之接人大禹一飯十起周公一沐三握夫接士忘疲禮賢忘倦聖賢猶且若是而況凡庸乎 曾子云書功不過百日諺云千里面首既堪力致何惜餘閒諸葛戒子尚憂粗拙汝輩鍾張真草之迹念並留心陰陽卜筮之書慎毋開卷射宮觀德君子攸宜彈琴自娛性靈取悅自餘伎術並勿經懷敬慎威儀以近有德女誠女儀兒女等各寫一通咸將自警女兼輔佐君子兒亦勸獎室家中外相承夫妻並立終朝三

省每月一尋實獲我心念無違也 閭閻賤第委巷庸

兄多分嫡庶構成痛痛不念胞胎雖別骨血不殊豈可
兒結父讎子兼母妬傷心犯順所不忍言汝等幼習義
方以歸名教察天倫之重既悟同生覺流俗之非母遵
履轍 女子七歲教以女儀讀孝經論語習行步容止
之節訓以幽閒聽從之儀禮云女子十年治絲枲織紉
觀祭祀納酒漿事人之禮此最為先十五而笄十七而
嫁既從禮制是謂成人若不微涉青編頗窺紺素粗識

古今之成敗測覽古女之得失不學牆面寧止於男通
之婦人亦無嫌也 婦人之德貴在貞靜內外之言不
出閨閭鄭衛之音尤非所習遊娛之樂無以寬懷夫若
東西家無者舊年少子幼慮遠防微家具無假於人饋
獻杜而弗納心懷廉謹外絕交通衣食斟量常令備足
披尋譜謀記憶親姻戚屬尊卑吉凶周至方為內範念
勗前規 諺云成家由婦破家由婦緬尋其語諒匪虛
談未有娣姒相憐而兄弟不睦娣姒相嫉而昆季雍和

者也 升堂拜母心所未通廣坐呈妻理尤不可人之
家法難易不同在於吾心以難勝易與其輕易寧可從
難

姚信

按信吳人
梁時太常

古人行善者非名之務非人之為心自甘之以為己度
嶮易不虧終始如一進合神契退同人道故神明祐之
衆人尊之而聲名自顯榮祿自至其勢然也又有內折
外同吐實懷詐見賢則暫自新獨居則縱所欲聞譽則

驚自飾見尤則棄善端凡失名位常多怨人而害善怨
一人則衆人疾之害一善則衆人怨之雖欲陷人而進
已不可得也祇所以自毀耳顧真偽不可掩褒貶不可
妄舍偽從實遺已察人可以通矣舍已就人去否適泰
可以宏矣貴賤無常唯人所速苟善則匹夫之子可至
王公苟不善則王公之子反為凡庶可不勉哉

楊椿

字延壽華陰人北齊侍
中歸老臨行戒子孫云

我家入魏之始即為上客自爾至今二千石方伯不絕

祿卹甚多於姻親知故吉凶之際必厚加贈襚來往賓
寮必以酒肉飲食故六姻朋友無憾焉國家初丈夫好
服綵色吾雖不記上谷翁時事然記清河翁時服飾恒
見翁著布衣韋帶常自約敕諸父曰汝等後世若富貴
於今日者慎勿積金一斤綵帛百匹已上用為富也不
聽與世家作婚姻至吾兄弟不能遵奉今汝等服乘漸
華好吾是以知恭儉之德漸不如上也吾兄弟若在家
必同盤而食若有近行不至必待其還亦有過中不食

忍饑相待吾兄弟八人今存者有三是故不忍別食也
又願畢吾兄弟不異居異財汝等眼見非為虛假如聞
汝等兄弟時有別齋獨食者此又不如吾等一世也

聞汝等學時俗人乃有坐待客者有驅馳勢門者有輕
論人惡者及見貴勝則敬重之見貧賤則慢易之此人
行之大失立身之大病也汝家仕皇魏以來高祖以下
乃有十郡太守三十二州刺史內外顯職時流少比汝
等若能存禮節不為奢淫驕慢假不勝人足免尤誚足

成名家吾今年始七十五自惟氣力尚堪朝覲天子所以孜孜求退者正欲使汝等知天下滿足之義為一門法耳非是苟求千載之名汝等能記吾言吾百年後終無恨矣

馬援

字文淵扶風人後漢伏波將軍兄子嚴敦並喜譏議而通輕俠客援在交趾還書戒之

吾欲汝曹聞人過失如聞父母之名耳可得聞口不可得言也好議論人長短妄是非正法此吾所大惡也寧死不願聞子孫有此行也汝曹知吾惡之甚矣所以復

言者施衿結褵申父母之戒欲使汝曹不忘之耳龍伯
高敦厚周慎口無擇言謙約節儉廉公有威吾愛之重
之願汝曹效之杜季良豪俠好義憂人之憂樂人之樂
清濁無所失父喪致客數郡畢至吾愛之重之不願汝
曹效也效伯高不得猶為謹勅之士所謂刻鵠不成尚
類鶩者也效季良不得陷為天下輕薄子所謂畫虎不
成反類狗者也訖今季良尚未可知郡將下車切齒州
郡以為言吾常為寒心是以不願子孫效也

楊侃

按侃字士業齊侍中椿之子為後魏大都督

我家受魏恩二千石方伯不絕記清河翁約敕諸父曰
汝等後世若富貴於今日者慎勿積金一斤綵帛百匹
已上用為富也不聽與世家作婚姻吾今日不為貧賤
然居住舍宅不作壯麗者正慮汝等後世不賢不能保
守之將為勢家所奪

張奐

字然明熒煌人
事漢靈帝太常

汝曹薄祐早失賢父財單藝盡今適喘息聞仲社輕傲

耆老侮狎同年極口恣意當崇長幼以禮自持聞燉煌
有人來同聲相道皆稱叔時寬仁聞之喜而且悲喜叔
時得美稱悲汝得惡論經言孔子於鄉黨恂恂如也恂
恂者恭謙之貌也聖賢難知且自以汝賢父為師汝父
寧輕鄉里耶年少多失改之為貴蘧伯玉年五十見四
十九年非但能改之不可不思吾言不自克責反云張
甲謗我李乙恚我我無是過爾亦已矣

石奮責子言

奮趙人漢九卿子內史慶酺入里門
不下車奮聞之不食慶肉袒請罪不

許舉宗及兄
建肉袒奮曰

內史貴人入閭里里中長老皆走匿而內史坐車中自

如固當

邴吉

字少卿魯國人漢孝宣丞相子顯嗣爵顯為
諸曹嘗從祠高廟至夕牲日乃使出取齋衣

吉大
怒曰

宗廟至重而顯不敬慎亡吾爵者必顯也

辛毗郤子言

字佐治陽翟人魏衛尉明帝任劉放
孫資毗不與往來子敬諫曰今孫劉

用事衆皆影附大人宜小降意和光
同塵不然必有謗言毗正色而曰

吾之立身自有本末就與劉孫不平不過令吾不作三公而已何危害之有大丈夫欲為公而毀其高節耶

